

四庫全書

集部

欽定四庫全書

張司業集卷四

唐 張籍 撰

五言律

省試行不由徑

田裏有微徑
賢人不復行
孰知求捷步
又恐異端成
從易衆所欲
安邪患亦生
誰能達大道
共此竟前程
子羽有遺跡
孔門傳舊聲
今逢大君子
士節自光明

夏日可畏

赫赫溫風扇炎炎夏日徂火威馳迥野畏景鑠遙途勢
矯翔陽翰功分造化鑪禁城千品獨黃道一輪孤落照
頻空簾餘暉卷夕梧如何倦遊子中路獨踟躕

罔象得玄珠

赤水今何處遺珠已渺然離婁徒肆目罔象乃通玄皎
潔因成性圓明不在泉暗中看夜色塵外照晴天無脛
真難掬懷疑寶易遷今朝搜擇得應免媚晴川

和李僕射雨中寄盧嚴二給事

郊原飛雨至城闕濕雲埋
迸點時穿牖浮漚欲上階
偏滋解籜竹併灑落花槐
晚潤生琴匣新涼滿藥齋
從容朝務退放曠振曹乖
盡日無來客閑吟感此懷

酬李僕射晚春見寄

戟戶洞初晨鶯聲雨後頻
虛庭清氣在衆藥濕光新
魚動芳池面苔侵老竹身
教鋪嘗酒處自問探花人
獨此長多病幽居欲過春
今朝聽高韻忽覺離埃塵

金華先生集卷四
憶盧常侍寄華山鄭隱者

獨住三峰下年深學煉丹一間松葉屋數片石花冠
酒待山中飲琴將洞裏彈開門移遠竹剪草出幽蘭
荒壁通泉架晴崖曬藥壇寄知騎省客長向白雲閑

和令狐尚書平泉東莊近居李僕射有寄

平地有清泉伊南古寺邊漲池閑遶屋出野徧澆田舊
隱離多日新隣得幾年探幽皆一絕選勝又雙全門靜
山光別園深竹影連斜分採藥徑直過釣魚船雞犬還

應識雲霞頓覺鮮
追思應不遠
賞愛諒難偏
此處堪長往
遊人早共傳
各當恩寄重
歸卧恐無緣

送鄭尚書出鎮南海

遠鎮承新命
王程不假催
班行爭路送
恩賜併時來
牙旆從城展
兵符到府開
蠻聲喧夜市
海色浸潮臺
畫角天邊月
寒關嶺上梅
共知公望重
多是隔年迴

徐州試反舌無聲

夏木多好鳥
偏知反舌名
林幽還共宿
時過即分聲
竹

金安四庫全書
外天空曉谿頭雨自晴居人宜寂寞深院益淒清入露
暗相失當風閑易驚來年上林苑知爾最先鳴

贈殷山人

鬱鬱山中客知名四十年恓惶身獨隱寂寞性應便世
業公侯籍生涯黍稷田藤懸讀書帳竹繫網魚船已種
千頭橘新開數脈泉閑遊攜酒遠幽語向僧偏入洞題
松過看花選石眠避喧長汨沒逢勝即留連自古多高
跡如君少比肩耕耘既辛苦章句已流傳昔日交遊盛

當時省閣賢同祀還共弊連轡每推先講叙居重席羣
儒願執鞭滿堂虛左待衆目望喬遷才異時難用情高
道自全畏人顏慘澹疎物勢迤邐賢者聞知命吾生復
禮玄深藏報恩劒久緝養生篇憔悴衆夫笑經過郡守
憐夕陽悲舊鶴霜氣動饑鷗處士誰能薦窮途世所捐
伯鸞堪寄食元淑苦無錢策蹇秋塵裏吟詩黃葉前故
裘餘白領廢瑟斷朱絃志氣終猶在逍遙任自然家貧
念婚嫁身老戀雲煙放逸栖巖鹿清虛飲露蟬鄭逃秦

谷口嚴愛越溪邊
霄漢子猶阻榮枯子不牽
出城一相遇感激意難宣

新城甲仗樓

謝氏起新樓西臨城角頭
圖功百仗麗藏器五兵修結
締穰薨固虛明戶檻幽魚龍
卷旗幟霜雪積戈矛暑雨
熇蒸隔涼風寔位留地高形
出沒山靜氣清優睥睨斜
光徹欄干宿靄浮芊芊抗稻
色脈脈苑谿流郡化王丞
相詩成沈隱侯居茲良得景
殊勝峴山遊


和李僕射西園

遇午歸閑處西庭敞四簷高眠著
瑟枕散帙檢書簽印在休通客
山晴好捲簾竹涼蠅到少藤暗蝶
爭潛曉鵲頻驚喜疎蟬不許拈石
苔生紫遍欄藥吐紅尖虛坐詩情
遠幽探道侶無所營尚勝地雖儉
復誰嫌

小苑春望宮池柳色

小苑春初至皇衢日更清遙瞻萬
條柳迥出九重城隱映龍池潤參
差鳳闕明影宜宮雪曙色帶禁煙
晴深淺

殘陽變高低
曉吹輕年光
正堪折欲寄
一枝橫



張司業集卷四

欽定四庫全書

集部

張司業集卷

五至八

詳校官監察御史_臣邱文愷

檢討_臣何思鈞覆勘

總校官編修_臣

王燕緒

校對官編修_臣

初彭齡

謄錄監生

_臣顧瑞相

欽定四庫全書

張司業集卷五

唐 張籍 撰

七言律詩

書懷寄元郎中

轉覺人間無氣味
常因身外省
因緣經過獨
愛遊山客
計較唯求買藥錢
重作學官閒
盡日一離江
島病多年
吟君釣客詩
中語
便欲南歸
榜小船

書懷寄顧八處士

自小儘成疎懶性人間是事總無功
別從僊客求方法時到僧家問苦空
老大登朝如夢裏貧窮作活似村中
未能即便休官去慚愧南山採藥翁

贈王秘書

早在山東聲價遠曾將上策佐嫖姚
賦來詩句無閒語老去官班未在朝
身屈祇聞詞客說家貧多見野僧招
獨從書閣歸時晚春水渠邊看柳條

贈令狐博士

頭白新年六十餘近聞生計轉空虛
久為博士誰人識自到長安賃舍居
騎馬出隨尋寺客呼兒散寫乞錢書
古來賢哲皆如此應是才高與衆疎

贈王司馬

白笏朱衫年少時久陪班列會朝衣
貯財不省關身用行義唯愁被衆知
藏得寶刀求主帶調成駿馬乞人騎
未曾相識多聞說遙望長如玉樹枝

酬秘書王丞見寄

相看頭白來城闕却憶漳谿舊往還今體詩中偏出格
常參官裏每同班街西借宅多隣水馬上逢人亦說山
芸閣水曹雖最冷與君長喜得身閒

謝裴司空寄馬

驟耳新駒駿得名司空還自寄書生乍離華廐移蹄澁
初到貧家舉眼驚每被閒人來借問多尋古寺獨騎行
長思歲旦沙堤上得從鳴珂傍火城

送裴相公赴鎮太原

盛德雄名遠近知
功高先乞守藩維
銜恩暫遣分龍節
署勅還同在鳳池
天子親臨樓上送
朝官齊出道邊辭
明年塞北清蕃落
應建生祠請立碑

寄元員外

外郎直罷無餘事
洒掃書堂試藥爐
門巷不教當要鬧
詩篇轉覺足功夫
月明臺上唯僧到
夜靜坊中有酒沽
朝省入頻閒日少
可能同伴舊遊無

贈梅處士

早聞聲價滿京城頭白江湖放曠情
講易自傳新註義題詩不著舊官名
近移馬跡山前住多向牛頭寺裏行
天子如今議封禪應將束帛請先生

贈王秘書

不曾浪出謁公侯唯向花間水畔遊
每著新衣看藥竈多收古器在書樓
有官祇作山人老平地能開洞府幽
自領閒司了無事得來君處喜相留

贈道士宜師

自到王城得幾年，已童蜀馬共隨緣。
兩朝侍從當時貴，五字聲名遠處傳。
舊住紅樓通內院，新承墨詔賜齋錢。
閒房暫喜居相近，還得陪師坐竹邊。

書懷寄王秘書

白髮如今欲滿頭，從來百事盡應休。
祇於觸目須防病，不擬將心更養愁。
下藥遠求新熟酒，看山多上最高樓。
賴君同在京城住，每到花時免獨遊。

題韋郎中新亭

起得幽亭景最新碧莎地上更無塵
琴書看盡猶嫌少松竹栽多亦稱貧
藥酒欲開期好客朝衣暫脫見閒身
成名同日官連署此處經過有幾人

送揚州判官

應得煙霞出俗心茆山道士共追尋
閒憐鶴貌偏能畫暗辨桐聲自作琴
長嘯每來松下坐新詩堪向雪中吟
征南幕裏多賓客君獨相知得較深

喜王起侍郎放牒

東風節氣近清明
車馬爭來滿禁城
二十八人初上牒
百千萬里盡傳名
誰家不借花園看
在處多將酒器行
共賀春司能鑒識
今年定合有公卿

送枝江劉明府

老著青衫為楚宰
平生治業有誰知
家僮從去愁行遠
縣吏迎來怪到遲
定訪玉泉幽院宿
應過碧澗早茶時
向南漸漸雲山好
一路唯聞唱竹枝

送從弟徹東歸

緱山領印知公奏才稱同時盡不如奉使賀成登冊禮
陪班看出降恩書去迴在路秋塵裏受詔辭歸曉漏初
早晚得為朝署拜閒坊買宅作隣居

哭胡十八遇

早得聲名年尚少尋常志氣出風塵文場繼續成三代
家族輝華在一身幼子見生才滿月選書知寫未呈人
送君帳下衣裳白數尺墳頭栢樹新

贈賈島

籬落荒涼僮僕饑樂遊原上住多時蹇驢放飽騎將出
秋卷裝成寄與誰拄杖傍田尋野菜封書乞米趁時炊
姓名未上登科記身屈惟應內史知

逢王建有贈

年狀皆齊初有髭鵲山漳水每追隨使君座下朝聽易
處士庭中夜會詩新作句成相借問閒參義盡共尋思
經今三十餘年事却說還同昨日時

移居靜安坊答元八郎中

長安寺裏多時住，雖守卑官不厭貧。
作活每常嫌費力，移居祇是貴容身。
旋開井淺偏宜樹，漸覺街閒省踏塵。
更喜往還相去近，門前減却送書人。

送楊少尹赴鳳

詩名往日動長安，首首人家卷裏看。
西學已行秦博士，南宮新拜漢郎官。
得錢祇了還書鋪，借宅常思事藥欄。
今去岐州生計薄，移居偏近隴頭寒。

送韓侍御歸山

聞君久卧在雲間，為佐嫖姚未得還。
新結茆廬招隱逸，獨騎驄馬入深山。
九靈洞口行應到，五粒松枝醉亦攀。
明日珂聲出城去，家僮不復掃柴關。

新除水曹郎答白舍人

年過五十到南宮，章句無名荷至公。
黃紙開呈趨府後，朱衣引入謝班中。
諸曹縱許為仙侶，羣吏多嫌是老翁。
最幸紫薇郎見愛，獨稱官與古人同。

送楊少尹赴滿城

官為本府當身榮，因得還鄉任野情。
自廢田園今作主，每逢耆老不呼名。
舊遊寺裏僧應識，新別橋邊樹已成。
公事沉閒詩更好，將隨相逐上田行。

哭元九少府

平生志業獨相知，早結雲山老去期。
初作學官常共宿，晚登朝列暫時閒。
來各數經過地，醉後齊吟唱和詩。
今日春風花滿宅，入門行哭見靈帷。

送侯判官赴廣州從軍

年少才高求自展，將身萬里赴軍門。
辟書遠到開呈客，公服新成著謝恩。
驛舫過江分白堊，戍亭當嶺見紅旛。
海花蠻草連冬有，行處無家不滿園。

答白杭州郡樓登望畫圖見寄

畫得江城登望處，寄來今日到長安。
乍驚物色從詩出，更想工夫下手難。
將展書堂偏覺好，每來朝士盡求看。
見君向此閒吟意，肯恨當時作外官。

酬浙東元尚書見寄綾素

越地繒紗紋樣新，遠封來寄學曹人。
便令裁製為時服，頓覺光榮上病身。
應念比官為棄置，獨能相賀更殷勤。
三千里外無由見，海上東風又一春。

贈項斯

端坐吟詩忘忍饑，萬人中覓似君稀。
門連野水風長到，驢放秋原夜不歸。
日煖剩收桑落葉，天寒更著舊生衣。
曲江亭上頻頻見，為愛鸕鷀雨裏飛。

贈趙將軍

當年膽畧已縱橫每見妖星氣不平身貴早登龍尾道
功高自破鹿頭城尋常得對論邊事委曲承恩掌內兵
會取安西將報國凌烟閣上大書名

送和蕃公主

塞上如今無戰塵漢家公主出和親
邑司猶屬宗卿寺冊號還同虜帳人
九姓旗旛先引路一生衣服盡隨身
羶城南望無迴日空見沙蓬水柳春

寒食內宴二首

朝光瑞氣滿宮樓，綵燾魚龍四面稠。
廊下御廚分冷食，殿前香騎逐飛毬。
千官盡醉猶教坐，百戲皆呈未放休。
共喜拜恩侵夜出，金吾不敢問行由。

又

城闕沈沈尚曉寒，恩當冷節賜餘歡。
瑞煙深處開三殿，香雨微時引百官。
寶樹樓前分繡幙，綵花廊下映華欄。
宮筵戲樂年年別，已得三迴對御看。

朝日勅賜櫻桃

仙果人間都未有今朝忽見下天門
捧盤小吏初宣勅當殿羣臣共拜恩
日色遙分廊下座露香才出禁中園
每年重此長先熟願得千春奉至尊

太白老人

日觀東峯幽客住竹巾藤帶亦逢迎
暗脩黃籙無人見深種胡麻共犬行
洞裏仙家常獨往壺中靈藥自為名
春泉四面遶茅屋日日唯聞杵臼聲

和裴司空酬滿城楊少尹

聖朝偏重大司空人詠元和第一功
擁節高臨襄水上題詩遠入漢城中
共驚向老多年別更憶登科舊日同
誰不望歸丞相府江邊楊柳又秋風

寄和州劉使君

別離已久猶為郡閒向春風倒酒鉶
送客特過沙口堰看花多上水心亭
曉來江氣連城白雨後山光滿郭青
到此詩情應更遠醉中高詠有誰聽

贈商州王使君

銜命南來會郡堂却思朝裏接班行才雄猶是山城守
道薄初為水部郎選勝相留開客館尋幽更引到僧房
明朝從此辭君去獨出商關路漸長

寄令狐賓客

勲名盡得國家傳退狎琴僧與酒仙還帶郡符經幾處
暫辭台座已三年留司未到龍樓下拜表長懷玉案前
秋日出城伊水好領誰相逐上閒船

寄梅處士

擾擾人間是與非官閒自覺省心機六行班裏身常下
九列符中事亦稀市客慣曾賒賤藥家童驚見著新衣
君今獨得居山樂應笑多時未辦歸

送施肩吾東歸

知君本是烟霞客被薦因來城闕間世業偏臨七里瀨
仙遊多在四明山早聞詩句傳人徧新得科名到處閒
惆悵灞亭相送去雲中琪樹不同攀

崑崙兒

崑崙家住海中州
蠻客將來漢地遊
言語解教秦吉了
波濤初過鬱林洲
金環欲落曾穿耳
螺髻長拳不裹頭
自愛肌膚黑如漆
行時半脫木綿裘

贈李杭州

仙郎白首未歸朝
應為蒼生領六條
惠化州人盡清淨
高情野鶴共逍遙
竹間虛館無朝訟
山畔青田長夏苗
終日政聲長獨坐
開門唯望浙江潮

送鄭尚書赴廣州

聖朝選將持符節，內制宣時百辟聽。
海北蠻夷來舞蹈，嶺南封管送圖經。
白鵬飛遠迎官舫，紅槿開當讌客亭。
此處莫言多瘴癘，天邊看取老人星。

賀秘書王丞南郊攝將軍

正初天子親郊禮，詔攝將軍領衛兵。
斜帶銀刀入黃道，先隨玉輅到青城。
壇邊不在千官位，仗外唯聞再拜聲。
共喜與君逢此日，病中無計得隨行。

送令狐尚書赴東都留守

朝廷重寄在關東，共說從來選上公。
勲業新城大梁鎮，恩榮更守洛陽宮。
行香暫出天橋上，巡禮常過禁殿中。
每領羣臣拜章慶，半開門仗日瞳瞳。

拜豐陵

歲朝園寢遣公卿，學省班中亦攝行。
身逐陵官齊再拜，手提木鐸叩三聲。
寒更報點來山殿，曉炬分行照栢城。
却下龍門看漸遠，金峯高處日微明。

贈孔尚書

能將直道歷榮班事著元和實錄間三表自陳辭北闕
一家相送入南山買來侍女教人嫁賜得朝衣在篋閒
宅近青山高靜處時歸林下暫開關

酬杭州白使君兼寄浙東元大夫

相印暫辭臨遠鎮掖垣出守復同時一行已作三年別
兩處空傳七字詩越地江山應共見秦天風月不相知
人間聚散真難料莫歎平生信所之

寄蘇州白二十二使君

三朝出入紫微臣
白金章未在身
登第早年同座主
題詩今日異州人
閭門柳色烟中遠
茂苑鶯聲雨後新
此處吟詩向山寺
知君忘却曲江春

送白賓客分司東都

赫赫聲名三十春
高情人獨出埃塵
病辭省闥歸閒處
恩許官曹作上賓
詩裏難同相得伴
酒邊多見自由身
老人也擬休官去
便是君家池上人

贈閻少保

辭榮戀闕未還鄉
脩養年多氣力强
半俸歸燒伏火藥
全家解說養生方
特承恩詔新開戟
每見公卿不下牀
竹樹晴深寒院靜
長懸石磬在虛廊

贈別王侍御赴任陝州司馬

京城在處閒人少
唯共君行並馬蹄
更和詩篇名最出
時傾盃酒興常齊
同趨闕下聽鐘漏
獨向軍前聞鼓鼙
今日春明門外別
更無因得到街西

田司空入朝

西來將相位兼雄不與諸君覲禮同
早變山東知順命
新收濟上立殊功
朝官叙謁趨門外
恩使宣迎滿路中
閭闔曉來銅漏靜
身當受冊大明宮

送浙西周判官

由來自是烟霞客
早已聞名詩酒間
天闕因將賀表到
家鄉新著賜衣還
常吟卷裏相酬句
自話湖邊舊住山
吳越主人偏愛重
多應不肯放君閒

送吳鍊師歸王屋山

玉陽峯下學長生洞府仙鄉已有名獨戴熊鬚冠暫出
唯將鶴尾扇同行煉成雲母休炊爨名得雷公當吏兵
却到瑤壇上頭宿應聞空裏步虛聲

送邵州林使君

詞客南行寵命新瀟湘郡入曲江津山幽自足探微處
俗朴應無爭競人郭外相連排殿閣市中多半用金銀
知君不作家私計遷日還同到日貧

寄王六侍御

漸覺近來筋力少，難堪今日在風塵。
誰能借問功名事，祇自扶持老病身。
積得藥資將助道，肯嫌家計不如人。
洞庭已置新居宅，歸去期君與作鄰。

送稽亭山寺僧

師住稽亭高處寺，斜廊曲閣倚雲開。
山門十里松間入，泉澗三重洞裏來。
名岳尋遊今已徧，家城禮謁便應迴。
舊房到日閒吟後，林下還登說法臺。

送汀州源使君

曾成趙北歸朝計因拜王門最好官為郡暫辭雙鳳闕
全家遠過九龍灘山鄉祇有輸蕉戶水鎮應多養鴨欄
地僻尋常來客少刺桐花發共誰看

寄孫洛陽格

久持刑憲聲名遠好是中朝正直臣赤縣上來應足事
青山老去未離身常思從省連歸馬乍覺同班少舊人
遙愛南橋秋日晚兩邊楊柳映天津

胡山人歸王屋因有贈

輾轉無成到白頭人間舉眼盡堪愁此生已是蹉跎去
每事終從鹵莽休雖作閒官少拘束難逢勝景可淹留
君歸與訪移家處若箇峯前最較幽

寄處士韓使君

南康太守負才豪五十如今未擁旄早得一人知姓字
常聞三事說功勞月明渡口漳江靜雲散城頭贛石高
郡政已成秋思遠閒吟應不問官曹

送從弟濛赴饒州

京城南去鄱陽遠風月悠悠別思勞
三領郡符新寄重再登科第舊名高
去程江上多看堦迎吏船中亦帶刀
到日更行清靜化春天應不見蓬蒿

羅道士

城裏無人得實年衣襟常帶臭黃烟
樓中賒酒唯留藥洞裏爭棋不賭錢
聞客語聲知貴賤持花歌詠似狂顛
尋常行處頻逢見世上多疑是謫仙

寄陸渾趙明府

與君學省同官處常日相隨說道情
新作陸渾山縣長
早知三禮甲科名郭中時有仙人住
城內應多藥草生
公事稀疏來客少無妨著屐獨閒行

同蔣韋二少監贈李郎中

舊年同過水曹郎各罷魚符自楚鄉
重著青衫承詔命
齊趨紫殿異班行別來同說經過事
老去相傳補養方
憶得當時亦連步如今獨有讀書堂

贈王侍御

心同野鶴與塵遠詩似冰壺見底清
府縣同趨昨日事升沉不改故人情
上陽春晚蕭蕭雨洛水寒來夜夜聲
自歎獨為折腰吏可憐驄馬路旁行

送金少卿副使歸新羅

雲島茫茫天半微向東萬里一帆飛
久為侍子承恩重今佐使臣銜命歸
過海便應將國信到鄉猶自著朝衣
從前此去人無數光彩如君定是希

送李司空赴鎮襄陽

中外兼權社稷臣，千官齊出拜行塵。
再調公鼎勲庸盛，三受兵符寵命新。
商路雪開旗旆遠，楚堤梅發驛亭春。
襄陽風景由來好，重與江山作主人。

送李僕射赴鎮鳳翔

由來勲業屬英雄，兄弟連榮列位同。
先入賊城擒首惡，盡封官庫讓元公。
旗幟獨繼家聲外，竹帛新添國史中。
天子欲收秦隴地，故教移鎮在扶風。

寄白二十二舍人

早知內詔過先輩，蹭蹬江南百事疎。
湓浦城中為上佐，廬峯寺後著幽居。
偏依仙法多求藥，長共僧遊不讀書。

三省比來名望重，肯容君去樂樵漁。

哭丘長史

曾見先皇殿上臣，丹砂久服不成真。
常騎馬在嘶空枥，自作書留別故人。
詩句徧傳天下口，朝衣徧送地中身。
最悲昨日同遊處，看却春風樹樹新。

早朝寄白舍人嚴郎中

鼓聲初動未聞雞
羸馬街中踏凍泥
燭暗有時衝石柱
雪深無處認沙堤
常參班裏人猶少
待漏房前月欲西
鳳闕星郎雖去遠
閤門開日入還齊

送友人盧處士遊吳越

羨君東去見殘梅
唯有王孫獨未回
吳苑夕陽明古堞
越宮春草上高臺
波生遠水鴈初下
風滿驛樓潮欲來
試問漁舟看雪浪
幾多江燕荇花開

留別微之

千時久與本心違
悟道深知前事非
猶厭勞形辭郡印
那能趣伴著朝衣
五千言裏教知足
三百篇中勸式微
少室雲邊伊水畔
比君較老合先歸

送從弟刪東歸

雲水東南兩月程
貪歸慶節馬蹄輕
春橋欲醉攀花別
野路閒吟觸雨行
詩價已高猶失意
禮司曾賞會成名
舊山風月知應好
莫過秋時不到京

送李餘及第後歸蜀

十年人好誦詩章今日成名出舉場
歸去唯將新誌牒後來爭取舊衣裳
山橋曉上蕉花暗水店晴看茅草黃
鄉里親情相見日一時携酒賀高堂

蘇州江岸留白樂天

銀泥裙映錦障泥畫舸停撓馬簇蹄
清管曲終鸚鵡語紅旗影動薄寒嘶
漸消酒色朱顏淺欲話離情翠黛低
莫忘使君吟詠處女墳湖北武丘西

張司業集卷五

欽定四庫全書

張司業集卷六

唐 張籍 撰

五言絕句

和韋開州居山十二首

宿雲亭

清淨當深處
虛明向遠開
卷簾無俗客
應只見雲來

梅溪

自愛新梅好行尋一徑斜不教人掃石恐損落來花

茶嶺

紫芽連白蘂初向嶺頭生自看家人摘尋常觸露行

流杯渠

淥酒白螺杯隨流去復回似知人把處各向面前來

盤石磴

壘石盤空遠層層勢不危不知行幾匝得到上頭時

桃塢

春塢桃花發多將野客遊日西殊未散看望酒缸頭

竹巖

獨入千竿裏緣巖踏石層笋頭齊欲出更不許人登

琵琶臺

臺上綠蘿春閒登不待人每當休假日著屐戴紗巾

葫蘆沼

曲沼春流滿新蒲映野鶯閒齋朝飯後拄杖遶行多

隱月岫

月出深峯裏清涼夏亦寒每嫌西落疾不得到明看

綉衣石榻

出城無別味藥草蕪魚果時有綉衣人同來石上坐

上士泉餅

堦上一眼泉四邊青石甃唯有護淨僧添餅將盥漱

涇州塞

行到涇州塞唯聞羌戍聲道邊雙古堠猶記向安西

野田

漠漠野田草草中牛羊道古墓無子孫白楊不得老

岸花

可憐岸邊樹紅蕊發青條東風吹渡水衝著木蘭橈

送遠客

憔悴遠歸客殷勤欲別杯九星壇下路幾日見重來

寄西峯僧

松暗水涓涓夜涼人未眠西峯月猶在遙憶草堂前

禪師

獨在西峯頂年年閉石房定中無弟子人到為焚香

惜花

山中春已晚處處見花稀明日來應盡林間宿不歸

題暉師影堂

日早欲參禪竟無相識緣道場今獨到惆悵影堂前

別于鵠

離燈及晨暉行人起復思出門兩相顧青山路逶迤

別韋蘇州

百年愁裏過萬感醉中來
惆悵城西別愁眉兩不開

從軍行

孤心眠夜雪滿眼是秋沙
萬里猶防塞三年不見家

張司業集卷六

欽定四庫全書

張司業集卷七

唐 張籍 撰

七言絕句

送蜀客

蜀客南行祭碧雞
木綿花發錦江西
山橋日晚行人少
時見猩猩樹上啼

蠻中

銅柱南邊毒草春
行人幾日到金麟
玉鐲穿耳誰家女
自抱琵琶迎海神

贈道士

茆山近別剡溪逢
玉節青旄十二重
自說年年上天去
羅浮最近海邊峯

平望驛

茫茫菰草平如地
渺渺長堤曲似城
日暮未知投宿處
逢人更問向前程

宿天竺寺寄靈隱僧

夜向靈谿息此身
風泉竹露淨衣塵
月明石上堪同宿
那作山南山北人

送元紹

昔日同遊漳水邊
如今重說恨綿綿
天涯相見還相別
客路秋風又幾年

美人宮碁

紅燭臺前兩翠娥
海沙鋪局巧相和
趨行移手巡收盡

數數看誰得最多

蠻州

瘴水蠻中入洞流人家多住竹棚頭青山海上無城郭

唯見松牌記象州

送元宗簡

貂帽垂肩窄皂裘雪深騎馬向西州暫時相見還相送

却閉閒門依舊愁

寄徐晦

鄠陂魚美酒偏濃
不出琴齋見雪峯
應勝昨來趨府日
簿書牀上亂重重

寄白學士

自掌天書見客稀
縱因休沐鎖雙扉
幾回扶病欲相訪
知向禁中歸未歸

喜王六同宿

十八年來恨別離
唯同一宿詠新詩
更相借問詩中語
共說如今勝舊時

題玉像堂

玉毫不著世間塵輝相分明十八身入夜無烟燈更好
堂中唯有轉經人

與賈島閒遊

水北原南草色新雪消風暖不生塵城中車馬應無數
能解閒行有幾人

哭丘長史

丘公已沒故人稀欲過街西更訪誰每到子城東路上

憶君相逐入朝時

哭孟寂

曲江院裏題名處十九人中最少年今日風光人不見
杏花零落寺門前

患眼

三年患眼今年免校與風光便隔生昨日韓家後園裏
看花猶似未分明

答劉兢

劉君久被時拋擲老向城中作選人昨日街西相近住
每來存問老夫身

贈華嚴寺僧

一身依止荒閒院燭耀窓中有宿烟偏禮華嚴經裏字
不曾行到寺門前

逢故人

山東二十餘年別今日相逢在上都說盡向來無限事
相看盡是白髭鬚

送蕭遠弟

街北槐花傍馬垂，病身相送出門遲。
與君別後秋風夜，作得新詩說向誰。

送辛少府任安縣

才多不肯浪容身，老大詩章轉更新。
選得天台山下住，一家全作學仙人。

贈任道人

長安多病無生計，藥鋪醫人亂索錢。
欲得定知身上事，

憑君為算小行年

招周居士

閒門秋雨濕牆莎
俗客來稀野思多
已掃書齋安藥竈
山人作意早經過

送許處士

高情自與俗人疎
獨向藍谿選僻居
會到白雲長取醉
不能窓下讀閒書

題楊秘書新居

愛閒不向爭名地宅在街西最靜坊
卷裏詩過一千首
白頭新受秘書郎

送暉師

九星壇下煎茶別五老峯頭覓寺居
作得新詩旋相寄
人來請莫達空書

送僧往金州

聞道溪陰山水好師行一一徧經過
事須覓取堪居處
若箇溪頭藥最多

尋徐道士

尋師遠到暉天觀
竹院森森閉藥房
聞入靜來經七日
仙童簷下獨焚香

答韋開州寄車前子

開州午日車前子
作藥人皆道有神
慚愧使君憐病眼
三千餘里寄閒人

憶故州

壘石爲山作野夫
自收靈藥讀仙書
如今身是他州客

每見青山憶舊居

送客遊蜀

行盡青山到益州
錦城樓下二江流
杜家曾向此中住
為到浣花谿水頭

送陸暢

共踏長安街裏塵
吳州獨作未歸身
貴門舊宅今誰住
君過西塘與問人

感春

遠客悠悠任病身
誰家池上又逢春
明年各自東西去
此地看花是別人

贈李司議

漢庭誰問投荒客
十歲天南著白衣
秋草茫茫惡谿路
嶺頭遙送北人歸

別客

青山歷歷水悠悠
今日相逢明日秋
繫馬橋邊楊柳樹
為君沽酒暫淹留

登樓寄胡家兄弟

獨上西樓盡日間
林烟衰淡鳥綿蠻
謝家兄弟重城裏
不得同看雨後山

答劉明府

身病多時又客居
滿城親舊盡相疎
可憐絳縣劉明府
猶解頻頻寄遠書

酬藤杖

病裏出門行步遲
喜君相贈古藤枝
倚來自覺身生力

金史卷之七
卷七
每向旁人說得時

法雄寺東樓

汾陽舊宅今為寺猶有當時歌舞樓
四十年來車馬客
古槐深巷暮蟬愁

寄故人

靜曲閒房病客居蟬聲滿樹槿花疎
故人祇在藍田縣
強半年來不得書

鄭婦哭征夫

雙鬟初合便分離
萬里征夫不得隨
今日軍回身獨沒
去時鞍馬別人騎

和崔駙馬聞蟬

鳳凰樓下多歡樂
不覺秋風暮雨天
應為昨來身暫病
蟬聲得到耳旁邊

和裴僕射看櫻桃花

昨日南園新雨後
櫻桃花發舊枝柯
天明不待人同看
遶樹重重履跡多

和郭明府縣中會飲

一樽清酒兩人同好在街西水縣中
自恨病身相去遠此時閒坐對秋風

唐興觀看花

新紅舊紫不相宜看覺從前兩月遲
更向同來詩客道明年到此莫過時

九華觀看花

街西無數閒遊處不似九華仙觀中
花裏可憐池上景

幾回牆壁貯春風

贈姚合

丹鳳門前向曉開
千官相次入朝來
唯君獨走衝塵土
下馬橋邊報直迴

同韋員外開元觀尋時道士

觀裏初晴竹樹涼
閒行共到最高房
昨來官罷無生計
欲就師求斷穀方

同韓侍御南谿夜賞

喜作閒人得出城南谿兩月逐君行忽聞新命須歸去
一夜船中語到明

使行望悟真寺

探玉峯連佛寺幽高高斜對驛門樓無端來去騎官馬
寸步教身不得遊

重陽日至峽道

無限青山行已盡回看忽覺遠離家逢高欲飲重陽酒
山菊今朝未見花

贈主客劉郎中

憶昔君登南省日老夫猶是褐衣身誰知二十餘年後
來作學曹相替人

唐昌觀玉藥花二首

千枝花裏玉塵飛阿母宮中見亦稀應共諸仙鬪百草
獨來偷折一枝歸

又

九色雲中紫鳳車尋仙來到洞仙家飛輪回處無蹤跡

唯有班班滿地花

秋思

洛陽城裏見秋風
欲作家書意萬重
復恐匆匆說不盡
行人臨發又開封

憶遠

行人猶未有歸期
萬里初程日暮時
唯愛門前雙柳樹
枝枝葉葉不相離

玉仙館

長谿新雨色如泥
野水陰雲盡向西
楚客天南行漸遠
山山樹裏鷓鴣啼

寄府吏

野水尋花共作期
今朝出郭不相隨
待君公事有閒日
此地春風應過時

涼州詞三首

邊城暮雨鴈飛低
蘆筍初生漸欲齊
無數鈴聲遙過磧
應馱白練到安西

又

古鎮城門白磧開胡兵往往傍沙堆
巡邊使客行應早
欲問平安無使來

又

鳳林關裏水東流白草黃榆六十秋
邊將皆承主恩澤
無人解道取涼州

宮詞二首

新鷹初放兔猶肥白日君王在內稀
薄暮千門臨欲鎖

紅粧飛騎向前歸

又

黃金捍撥紫檀槽絃索初張調更高盡理昨來新上曲
內官簾外送櫻桃

華清宮

溫泉流入漢離宮宮樹行行浴殿空武帝時人今欲盡
青山空閉御墻中

崔駙馬養鶴

身閒無事稱高情
已有人間章句名
求得鶴來教剪翅
望仙臺下亦將行

閒遊二首

老身不計人間事
野寺秋晴每獨過
病眼較來猶斷酒
却嫌行處菊花多

又

終日不離塵土間
若為能得此身閒
今朝暫共遊僧語
更恨趨時別舊山

劉兵曹贈酒

一瓶顏色似甘泉
開向新栽小竹前
飲罷身中更無事
移牀獨就日陽眠

送王梧州

楚江亭上秋風起
看發蒼梧太守船
千里同行從此別
相逢又隔幾多年

春日早朝

曉陌春寒朝騎來
瑞雲深處見樓臺
夜來新雨沙墀濕

東上閤門應未開

寄朱闌二山人

為箇朝章束此身
眼看東路去無因
歷陽舊客今應少
轉憶隣家二老人

寄李渤

五度谿頭躑躅紅
嵩陽寺裏講時鐘
春山處處行應好
一月看花到幾峯

尋仙

谿頭一徑入青崖處處仙居隔杏花更見峯西幽客說
雲中猶有兩三家

寄王奉御

愛君紫閣峯前好新作書堂藥竈成見欲移居相近住
有田多與種黃精

題渭北寺上方

昔祭郊壇今謁陵寺中高處復來登十餘年後人多別
喜見當時轉讀僧

同白侍郎杏園贈劉郎中

一去瀟湘頭欲白
今朝始見杏花春
從來遷客應無數
重到花前有幾人

答鄱陽客藥名詩

江臯歲暮相逢地
黃葉霜前半夏枝
子夜吟詩向松桂
心中萬事喜君知

寄宋景

詔發官兵取亂臣
將軍弓箭不離身
君今獨在征東府

莫遣功名屬別人

倡女詞

輕鬢叢梳闊掃眉為嫌風日下樓稀畫羅金縷難相稱
故著尋常淡薄衣

答元八遺紗帽

黑紗方帽君邊得稱到山前坐竹牀唯恐被人偷樣剪
不曾閒戴出書堂

題僧院

聞師行講青龍院本寺住來多少年
靜掃空房唯獨坐
千莖秋竹在簷前

送元八

百神齋祭相隨徧
尋竹看山亦共行
明日城西送君去
舊遊重到獨題名

吳楚歌詞

庭前春鳥啄林聲
紅夾羅襦縫未成
今朝社日停針線
起向朱櫻樹下行

題方睦上人月臺觀

一身清淨無童子
獨坐空堂得幾年
每夜焚香通月觀
可憐光景最團圓

華山廟

金天廟下西京道
巫女紛紛走似煙
手把紙錢迎過客
遣求恩福到神前

病中酬元宗簡

東風漸暖滿城春
獨向深房養病身
莫說櫻桃花已發

今年不作看花人

寺宿齋

晚到金光門外寺
寺中新竹隔簾多
齋宮禁與僧相見
院院開門不得過

贈施肩吾

世間漸覺無多事
雖有空名未著身
合取藥成相待喫
不須先作上天人

贈王建

于君去後交游少東野亡來篋笥貧
賴有白頭王建在眼前猶見詠詩人

逢賈島

僧房逢著款冬花出寺吟行日已斜
十二街中春雪滿馬蹄今去入誰家

離宮怨

高堂別館連湘渚長向春江開萬戶
荆王去去不復來宮中美人自歌舞

春別曲

長江春水綠堪染蓮葉出水大如錢
江頭橘樹君自種
那長繫木蘭船

成都曲

錦江近西烟水綠
新雨山頭荔枝熟
萬里橋邊多酒家
遊人愛向誰家宿

楚妃怨

梧桐葉下黃金井
橫架轆轤牽素綆
美人初起天未明

手拂銀瓶秋水冷

寒塘曲

寒塘沉沉柳葉疎水暗人語驚栖鳬舟中少年醉不起
持燭照水射游魚

春堤曲

野塘鵝鵲飛樹頭綠蒲紫菱葢碧流狂客誰家愛雲水
日日獨來城下遊

山禽

山禽毛如白練帶
栖我庭前栗樹枝
獼猴半夜來取栗
一雙出林向月飛

秋山

秋山無雲復無風
溪頭看月出深松
草堂不閉石牀靜
葉間墜露聲重重

宿山祠

秋草宮人斜裏墓
宮人誰送墓來時
千千萬萬皆如此
家在邊城亦不知

送律師歸婺州

京中開講已多時曾作壇頭證戒師
歸到雙溪橋北寺鄉僧爭就學威儀

無題

桃蹊柳陌好經過燈下粧成月下歌
為是襄王故宮地至今猶有細腰多

山中醺人

山中日暖春鳩鳴逐水看花任意行
向晚歸來石窓下

菖蒲葉上見題名

題故僧影堂

香消雲鎖舊僧家
僧剝殘形半壁斜
日暮松烟寒漠漠
秋風吹破絳蓮花

弱栢院僧影堂

弱栢倒垂如線蔓
簷頭不見有枝柯
影堂香火長相續
應得人來禮拜多

玉真觀

臺殿曾為貴主家春風吹盡竹窓紗院中仙女修香火
不許閒人入看花

弟蕭遠雪夜同宿

數卷新遊蜀客詩長安僻巷得相隨草堂雪夜携琴宿
說似青城館裏時

虎丘寺

望月登樓海氣昏劒池無底浸雲根老僧只怕山移去
日暮先教鎖寺門

贈劉郎中

怪君把酒空惆悵同是貞元花下人自別花來多少事
東風二十四回春

酬朱慶餘

越女新粧出鏡心自知明豔更沉吟齊紈未是人間貴
一曲菱歌敵萬金

綺繡宮

玉樓傾側粉牆空重疊青山繞故宮武帝去來紅袖盡

野花黃蝶領春風

欽定四庫全書

張司業集
卷七

三

張司業集卷七

欽定四庫全書

張司業集卷八

唐 張籍 撰

書

與韓愈書

古之胥教誨舉動言語無非相示以義非苟相諛悅而已執事不以籍愚昧時稱發其善教所不及也誠相與不間塞於他人之說是近於古人之道也籍今不復以

義是執竿而拒歡來者烏所謂承人以古人之道歟須
承論於執事嘗以為世俗陵靡不及古昔蓋聖人之道
廢弛之所為也宣尼歿後楊朱墨翟恢詭異說干惑人
聽孟軻作書而正之聖人之道復存於世秦氏滅學漢
重以黃老之術教人使人寢惑揚雄作法言而辯之聖
人之道猶明及漢衰末西域浮屠之法入于中國中國
之人世世譯而廣之黃老之術相沿而熾天下之言善
者惟二者而已矣昔者聖人以天下生之道曠乃物

其金木水火土穀藥之用以厚之因人資善乃明乎仁
義之德以教之俾人有常故治生相存而不殊今天下
資於生者咸備聖人之器用至於人情則溺乎異學而
不由乎聖人之道使君臣父子夫婦朋友之義沉于世
而邦家繼亂固仁人之所痛也自揚子雲作法言至今
近千載莫有言聖人之道者言之者惟執事焉耳習俗
者聞之多怪而不信徒相為訾終無裨于教也執事聰
明文章與孟軻揚雄相若盍為一書以興存聖人之道

使時之人後之人知其去絕異學之所為乎曷可俯仰
於俗囂囂為多言之徒哉然欲舉聖人之道者其身亦
由之也此見執事多尚駁雜無實之說使人陳之於前
以為歡此有以累於令德又商論之際或不容人之短
如任私尚勝者亦有所累也先王存六藝自有常矣有
德者不為益以為損況為博塞之戲與人競財乎君子
固不為也今執事為之以廢棄時日竊實不識其然且
執事言論文章不謬於古人今所為或有不出於世之

守常者竊未為得也願執事絕博塞之好棄無實之談
弘廣以接天下之士嗣孟軻揚雄之作辯楊墨老釋之
說使聖人之道復見於唐豈不尚哉籍誠知之以材識
頑鈍不敢竊居作者之位所以資於執事而為之爾若
執事守章句之學因循於時置不朽之盛業與夫不知
言亦無以異矣籍再拜

重與韓退之書

籍不以其愚輒進說於執事執事以導進之分復賜還

答曲折教之使昏塞者不失其明然猶有所見願復於
執事以畢其說焉夫老釋惑乎生人久矣誠以世相沿
化而莫之知所以久惑乎耳執事材識明曠可以任著
書之事故有告焉今以為言諭之不入則雖觀書亦無
所得為此而止未為至也夫處一位在一鄉其不知聖
人之道可以言諭之不入乃舍之猶有已化者為證也
天下至廣民事至衆豈可資一人之口而親諭之者近
而不入則舍之遠而有可諭者又豈可以家至而說之

乎故曰莫若為書為書而知者則可以化乎天下矣可以傳于後世矣若以不入者而止為書則為聖人之道奚傳焉士之壯也或從事於要劇或旅遊而不安宅或偶時之喪亂皆不遑有所為況有疾疢吉凶虞其間哉是以君子汲汲於所欲為恐終無所顯於後若皆待五六十而後有所為則或有遺恨矣今執事雖參於戎府當四海弭兵之際優游無事不以此時著書而曰俟後或有不及曷可追乎天之與人性度不相遠也不必老

而後有成立者昔顏子之庶幾豈待五六十乎執事目不睹聖人而究聖人之道材不讓於顏子矣今年已踰之曷懼於年未至哉顏子不著書者以其從聖人之後聖人已有定制故也若顏子獨立于世必有所云著也古之學君臣父子之道必資於師師之賢者其徒數千或數百人是以沒則紀其師之說以為書若孟軻者是已傳者猶以孟軻自論集其書不云沒後其徒為之也後軻之世發明其學者揚雄之徒咸自作書今師友道

喪寢不及揚雄之世不自論著以興聖人之道欲待孟軻之門人必不可冀也君子發言舉足不遠於理未嘗聞以駁雜無實之說為戲也執事每見其說亦拊几呼笑是撓氣害性不得其正矣苟止之不得曷所不至焉或以為中不失正將以苟悅於衆是戲人也是玩人也非示人以義之道也



張司業集卷八